



Z A P I S N I K
8. sjednice Komisije za vanjsku trgovinu i carine
Predstavničkog doma Parlamentarne skupštine BiH,
održane 2. jula 2007. godine

Sjednica je počela u 11 sati.

Sjednicom je predsjedavala Snježana Rajilić, predsjedavajuća Komisije.

Sjednici su prisustvovali: Jerko Ivanković Lijanović, Mehmed Suljkanović, Ekrem Ajanović, Šemsudin Mehmedović, Slavko Jovičić i Salko Sokolović, članovi Komisije.

Opravdano su odsustvovali Jozo Križanović i Hadži Jovan Mitrović.

Sjednici su prisustvovali i: Sabrija Šerifović, Dušan Nešković, Dragiša Mekić, pomoćnici ministra vanjske trgovine i ekonomskih odnosa BiH, Branislav Žugić, šef Kabineta ministra vanjske trgovine i ekonomskih odnosa BiH, Lidija Vignjević, direktorica Instituta za intelektualno vlasništvo BiH, Rešad Dautefendić, novinar „Dnevnog lista“, i Emira Češljarić, sekretar Komisije.

Na sjednici Komisije, s dopunjenom tač. 4. i 5., predložen je i jednoglasno usvojen sljedeći

D N E V N I R E D

1. Usvajanje Zapisnika 6. sjednice Komisije,
2. Ponovno razmatranje Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006.), radi dostavljanja mišljenja Komisije Predstavničkom domu,
3. Razmatranje Prijedloga zakona o zaštiti planova rasporeda integriranih kola, predlažać: Vijeće ministara BiH, radi dostavljanja mišljenja Predstavničkom domu, u skladu s članom 104. Poslovnika Predstavničkog doma,
4. Razmatranje i usvajanje konačnog teksta, radi stavljanja u proceduru, prijedloga zakona o izmjenama i dopunama: Zakona o akcizama BiH, Zakona o carinskoj tarifi BiH i Zakona o carinskoj politici BiH,
5. Upoznavanje o realizaciji 10 zaključaka utvrđenih na 6. sjednici Komisije na osnovu rasprave vođene na Okruglom stolu, 13. marta 2007.,
6. Tekuća pitanja.

Ad-1

Zapisnik 6. sjednice Komisije usvojen je jednoglasno, bez primjedbi.

Ad-2.

Ponovno razmatranje Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006.), radi dostavljanja mišljenja Komisije Predstavničkom domu

Snježana Rajilić upoznala je prisutne da je, 20.6.2007., održan sastanak u vezi sa zaključkom sa 7. sjednice Komisije, upućenim predsjedavajućem Vijeća ministara BiH i Ministarstvu vanjske trgovine i ekonomskih odnosa BiH. Sastanku su prisustvovali predsjedavajući Vijeća ministara BiH, ministar MVTEO i entitetski ministri finansija. Preporučeno je da entitetska ministarstva poljoprivrede i finansija utvrde da li postoji mogućnost da se iz budžeta entiteta izdvoje sredstva za stimulaciju poljoprivredne proizvodnje, smanji taksa poljoprivrednicima za gorivo, te izradi konačan prijedlog za izmjenu carinske tarife.

U diskusiji su učestvovali: Slavko Jovičić, Šemsudin Mehmedović, Snježana Rajilić, Jerko Ivanković Lijanović, Mehmed Suljkanović i Ekrem Ajanović.

Slavko Jovičić postavio je pitanje predstavnicima MVTEO da li ima prostora da u bilateralnim kontaktima sa zemljama u okruženju BiH dobije maksimum.

Šemsudin Mehmedović apostrofirao je da Komisija nije dobila zvanično odgovor na zaključak sa 7. sjednice, upućen 13. juna 2007., te su Jerko Ivanković Lijanović i Mehmed Suljkanović predložili da se CEFTA ne razmatra dok se Vijeće ministara BiH ne izjasni o zaključku sa 7. sjednice Komisije. **Jerko Ivanković Lijanović** predložio je da radna grupa sačini zakon o provođenju CEFTA koji bi stupio na snagu paralelno sa Sporazumom. Parafrazirao je nalaz vještaka o štetnim finansijskim posljedicama Sporazuma iz materijala Udruženja poljoprivrednika u BiH, dostavljenog neposredno pred održavanje sjednice Komisije.

Sabrija Šerifović istakao je da MVTEO formalno nije dobilo navedeni zaključak Komisije, da je CEFTA multilateralni sporazum te da se ne mogu donositi nikakve mjere i odluke i da nema nikakvih intervencija na Sporazum. Na BiH je da ratificira ili ne ratificira CEFTA-u koja je dio našeg procesa ulaska u EU. Član 23. bis ne može se izolirano posmatrati iz Sporazuma, a stimulacija domaće poljoprivredne proizvodnje je u nadležnosti entiteta koji donose strategiju o tim mjerama. Region će profitirati sa CEFTA-om, ulaganjem stranih investicija.

Snježana Rajilić konstatirala je da sada imamo deficit i zaštitu od 40% iz carinske tarife na određene proizvode na osnovu Ugovora o slobodnoj trgovini, koja ratifikacijom CEFTA nestaje.

Ekrem Ajanović konstatirao je da su stavovi i s prošle sjednice Komisije išli u pravcu prestanka protesta poljoprivrednika ispred zgrade institucija BiH. Suština je član 23. bis CEFTA-e i dostavljanje odgovora od Vijeća ministara BiH na zaključak Komisije. Sve se svodi na to kako se zaštititi od prekomjernog uvoza robe iz Hrvatske i Srbije. Objektivni razlozi su nepostojanje ministarstva poljoprivrede na državnom nivou i stimuliranje poljoprivrednih proizvođača.

Branislav Žugić govorio je po ovlaštenju ministra vanjske trgovine i ekonomskih odnosa BiH. Rekao je da su sve aktivnosti MVTEO usmjerene u pravcu zaključka Komisije i dogovora na sastanku, održanom 20.6. 2007.

Ministarstvo je stav o članu 23. bis Sporazuma uputilo Direkciji za evropske integracije, a iz Evropske komisije doći će konsultant da razjasni značenje člana 23. bis koji je koncipiran na određenim preduslovima.

Osnovni problemi su s bilateralnim ugovorima o slobodnoj trgovini koje nismo uskladili sa uslovima WTO. Član 23. bis ne može se posmatrati izolirano iz Sporazuma. Donošenje zakona za njegovu primjenu neće donijeti ništa novo jer Sporazum ima jaču pravnu snagu od zakona. Aktivnosti Ministarstva usmjerene su u tri pravca i to da se:

1. po ubrzanom postupku usvoji Zakon o izmjenama i dopunama Zakona o carinskoj tarifi BiH koji bi omogućio uvoz repromaterijala i opreme za potrebe poljoprivrede bez carine, koji je usaglašen s entitetima i UIO BiH 2006. godine;
2. dio izdvajanja iz budžeta entiteta za stimuliranje poljoprivredne proizvodnje poveća u Federaciji BiH sa 3% na 4%, a u Republici Srpskoj sa 4% na 5%;
3. ukine taksa na dizel-gorivo od 15 pfeninga po litru koje se koristi za poljoprivrednu proizvodnju.

Komisija je jednoglasno usvojila sljedeći **z a k l j u č a k**:

a) predlaže se Kolegiju Predstavničkog doma da razmatranje Sporazuma o izmjeni i pristupanju Centralnoevropskom sporazumu o slobodnoj trgovini (CEFTA 2006) odgodi sa 12.sjednice za narednu sjednicu Doma,

b) da se formira tim koji će, zajedno sa Ministarstvom vanjske trgovine i ekonomskih odnosa BiH, razmotriti mogućnost donošenja posebnog zakona o primjeni CEFTA (član 23. bis), ili da Vijeće ministara BiH donese mjere koje bi se odnosile na navedeni član Sporazuma,

c) da se uputi urgencijA predsjedavajućem Vijeća ministara BiH u vezi s realizacijom zaključka sa 7. sjednice Komisije za vanjsku trgovinu i carine, od 12. juna 2007.

Na prijedlog predstavnika Ministarstva vanjske trgovine i ekonomskih odnosa BiH Komisija je jednoglasno zaključila da održi sastanak s profesorom Perom Wijkmanom, pravnim savjetnikom za CEFTA-u koji će odgovarati na pitanja, te dati pravna tumačenja odredbi Sporazuma koje se odnose na zaštitne mjere u poljoprivredi.

Profesor Per Wijkman je viši tehnički savjetnik u Trgovinskoj radnoj grupi Pakta stabilnosti, bio je uključen u pregovore o CEFTA-i i učestvovao na seminaru o CEFTA-i za članove parlamenata, održanom u Briselu u aprilu 2007. godine.

Sastanak će biti održan u četvrtak, 19. juna 2007., u 10 sati, u zgradi institucija BiH.

Ad-3

Razmatranje Prijedloga zakona o zaštiti planova rasporeda integriranih kola, predlagач: Vijeće ministara BiH, radi dostavljanja mišljenja Predstavničkom domu, u skladu s članom 104. Poslovnika Predstavničkog doma

Lidija Vignjević, direktorica Instituta za intelektualno vlasništvo BiH, upoznala je prisutne o osnovama i razlozima za donošenje navedenog zakona.

Rekla je da su, na osnovu Sporazuma o trgovinskim aspektima prava intelektualnog vlasništva (TRIPS sporazum), utvrđene obaveze država članica radi osiguranja efikasne i odgovarajuće zaštite prava intelektualnog vlasništva, a što je jedan od prioriteta pristupanja Bosne i Hercegovine WTO.

Donošenjem predloženog zakona stvorile bi se pretpostavke za: uspostavljanje cjelovitog i jedinstvenog bh. sistema prava intelektualnog vlasništva; ispunjavanje bh.

zahtjeva u odnosu na određene međunarodne sporazume, npr. WTO, TRIPS što BiH vodi prema strateškom cilju pristupanja WTO, te uključenja u evropske integracije; doprinos stvaranju preduslova za prilagođavanje privrede BiH savremenim privredama, posebno privredi EU. Bosna i Hercegovina ratificirala je Ugovor o intelektualnom vlasništvu za integrirana kola – Vašington, 26. maja 1989., koji je stupio na snagu 7.12.2006.

Kako je predlagač na hrvatskom jeziku u Zakonu riječi: “integrirano kolo” preveo riječima: “integrirani sklop”, utvrđeno je, da se na svim jezicima u službenioj upotrebi u BiH može samo prevesti kao integrirano/integrirano kolo. U stručnom i funkcionalnom značenju integrirano kolo nema isto značenje što i integrirani sklop, što će biti uzeto u obzir prilikom daljnjih prijevoda na hrvatski jezik. Ovu konstataciju prihvatio je predlagač zakona u pravcu ispravke koju treba tretirati kao grešku u prijevodu.

Nakon rasprave Komisija je jednoglasno prihvatila principe predloženog zakona i na osnovu člana 104. Poslovnika Predstavničkog doma dostavit će mišljenje predsjedavajućem Predstavničkog doma.

Ad-4

Razmatranje i usvajanje konačnog teksta, radi stavljanja u proceduru, Prijedloga zakona o izmjenama i dopunama: Zakona o akcizama BiH, Zakona o carinskoj tarifi BiH i Zakona o carinskoj politici BiH

Šemsudin Mehmedović je, u ime Radne grupe, upoznao prisutne da je konačan tekst izmjena i dopuna tri navedena zakona urađen, 19. juna 2007., te da će ga Komisija, na osnovu člana 99. Poslovnika Doma, dostaviti predsjedavajućem Predstavničkog doma na razmatranje po osnovnom zakonodavnom postupku.

Nakon rasprave, Komisija je zaključila da se **Prijedlog o izmjenama i dopunama Zakona o carinskoj politici BiH**, i pored izjašnjenja UIOBiH, od 26.6.2007. (u kojem se navodi da nema potrebe za dopunu člana 185. niti za uvođenje novog člana 188a. navedene izmjene Zakona), dostavi u predloženom tekstu.

U Prijedlogu zakona o izmjenama i dopunam Zakona o akcizama BiH

Član 3. mijenja i glasi:

“Član 9. mijenja se i glasi:

(1) Na promet derivata nafte akciza se plaća po litru, i to na:

1. petrolej 0,30 KM; (tarifni br. 2710 11 21 00)
2. dizel-gorivo 0,30 KM
3. ulje za loženje ekstra lako (ES) i lako spacijalno (LS) 0,30 KM
4. motorni benzin-bezokolovni 0,35 KM,
5. motorni benzin 0,40 KM.

(2) Na promet derivata nafte iz stava (1) tač.2., 4. i 5. ovog člana plaća se putarina po litru u iznosu od 0,20 KM.“

U Zakonu u izmjenama i dopunama Zakona o carinskoj tarifi BiH iza Poglavlja 8. briše se Poglavlje 10. Žitarice.

Na osnovu rasprave i izvršenih izmjena u tekstu navedenih zakona, Komisija je jednoglasno zaključila da, prema odredbama Poslovnika Predstavničkog doma, na

bosanskom, hrvatskom i srpskom jeziku dostavi predsjedavajućem Predstavničkog doma zakone na razmatranje po osnovnom zakonodavnom postupku.

Ad-5

Upoznavanje o realizaciji 10 zaključaka utvrđenih na 6. sjednici Komisije na osnovu rasprave vođene na Okruglom stolu, 13. marta 2007.

Predsjedavajuća Komisije pročitala je Prijedlog zaključaka usvojenih na 6. sjednici Komisije, održanoj 24. maja 2007., sačinjenih na osnovu rasprave vođene na Okruglom stolu o temi: "Analiza zakonske regulative u funkciji zaštite domaće proizvodnje", s ciljem poboljšanja stanja u poljoprivredi.

Od ukupno 10 tačaka prijedloga zaključaka može se konstatirati da ih je Komisija realizirala, osim zaključka tačke 6., a realizacija zaključka tačke 9. je u nadležnosti entitetskih službi za sanitarnu i fitosanitarnu zaštitu.

Ad-6.

U okviru ove tačke članovi Komisije raspravljali su o:

1. Sporazumu o prestanku protesta, dostavljenog neposredno pred početak sjednice Komisije, od Udruženja poljoprivrednika u BiH a u vezi s protestom ovog udruženja pred zgradom institucija BiH;

Nakon rasprave, Komisija je jednoglasno zaključila da uputi dopis Kolegiju Doma i obavijesti ga o sljedećem:

a) Sadržaj Sporazuma, između ostalog, ima za cilj uklanjanje šatorskog naselja ispred zgrade institucija BiH, uz uslov da se donesu mjere prilikom primjene člana 23. bis CEFTA-e i njegovim stupanjem na snagu, ukidanjem carine na uvoz repromaterijala i opreme za poljoprivredu, te usvajanjem Zakona o poljoprivredi BiH.

b) Komisija je već do sada, u okviru nadležnosti, zaključcima dostavljenim Vijeću ministara BiH, Ministarstvu vanjske trgovine i ekonomskih odnosa BiH, Upravi za indirektno oporezivanje BiH i Vanjskotrgovinskoj komori BiH, preduzela određene radnje iz odredbi čl.1. i 2. teksta navedenog Sporazuma.

c) Komisija je zaključila da se obrati Kolegiju Predstavničkog doma s prijedlogom da Kolegij zauzme stav radi preduzimanja daljnjih radnji prema navedenom Sporazumu u vezi s njegovom opravdanošću.

2. Konferenciji koja će se, u organizaciji Vanjskotrgovinske komore BiH, održati 10. jula 2007. u Sarajevu o temi „Stanje i mogućnost unapređenja vanjskotrgovinske razmjene BiH“ prisustvuju: Snježana Rajilić, Mehmed Suljkanović i Jerko Ivanković Lijanović.

Sjednica je završena u 13,30 sati.

Sekretar Komisije
Emira Češljarić

Predsjedavajuća Komisije
Snježana Rajilić